

寄庵詩文鈔

余於新城友張莪石孝廉王秋水茂才至今幾三十年  
不絕交莪石嚴厲秋水疏曠莪石學博才瞻文深者如  
西漢醇者如北宋詩偶一爲之非其性所好也秋水癖  
於詩澹遠處有其家漁洋遺意餘不求盡肖而能小變  
之亦學爲文皆世所謂名士也然莪石不好名秋水好  
名甚見人無識不識輒誦其詩強之聽而卒得一時大  
人先生爲之序裒然巨集行於世莪石隨手散棄不自  
收拾有勸其彙輯藏弄者則曰吾文視古作者不逮也  
且此自後人事吾何與焉蓋兩人者其不同有如此余

則不然亦好名而不汲汲求於文未得門入存詩自居東養疾始二十餘年得詩約千首刪存五百餘首聽門人輩刊刻成帙惟義石一序冠其首而自巳跋其後諸子序皆不存也嘉慶丙寅家居迄於今壬申七年中得詩又將千首刪存可五百餘首亦不求人序自謂介於義石秋水之間者寄菴也今夫詩文之傳與不傳與其濶狹久暫之數以詩文不以序也三代下文莫如韓詩莫如杜韓沒後其門人李漢始編而序之杜詩亦未序自生前韓之友孟郊柳宗元杜之友李白高適岑參其

最著者皆未有序裴度嚴武之徒無論矣豈惟杜韓哉  
孔子刪述六經不聞鄭子產蘧伯玉爲之序周公作周  
禮不聞召公奭太公望爲之序卽二典三謨亦不聞同  
堂諸大聖人互相爲序也凡書之有序皆後人重其書  
而爲之豈不信哉山東門人有索余近詩者將鈔寄之  
此固續編例更得序然得如莪石者一序可矣不求多  
人也亦不求莪石再也爲述其意如此以是爲介於莪  
石秋水之間之寄菴而已壬申五月晦日寧州劉大紳

詩苑詩鈔續

一卷古今體詩三十七首

二卷古今體詩四十六首

三卷古今體詩六十首

四卷古今體詩八十三首

五卷古今體詩九十七首

六卷古今體詩九十八首

七卷古今體詩一百十三首

八卷古今體詩七十三首

九卷古今體詩五十九首

十卷古今體詩一百六首

共七百六十一首

寄菴詩鈔續一

丙寅

寧州劉大紳

照華弟邀同諸弟遊慈光寺

閉拋烏帽臥南邦  
蘭若尋盟蠟屐雙  
不改山門當落日  
依然樓閣壓秋江  
樵餘松桂如僧老  
病後文章見客降  
回首昔年成一夢  
愁看雁影度前窓

觀刈稻

黃牛背上老雅稀  
倚杖門前弄夕暉  
白稻如雲初穫處  
避人蚱蜢向南飛

草堂偶題

山顏潭影入秋時身在畫中無一詩  
記向長安頻買畫閒愁曾斷幾莖髭

與昭華弟

隔牆雞犬亦無猜深巷柴門日日開  
乞得好花分子種留將明抱抱孫來  
樽空不少醒中趣詩澁何難病後裁  
只是出游多憾事人家僧舍半蒼苔

從李向宸乞青藜

先臣校書天祿時帝遣太乙來觀之  
夜長短檠不到處



青藜出袖徐徐吹天明老人曳杖去仙家九節名空靈  
吾滇赤藤舊曾有赤龍遠遁無赤鬚百蠻屠兒學奇技  
輝千金產安所施人情賤老貴惡少衰翁徒步愁傾危  
君方壯歲骨力健種得滿圃將何爲我今束書愧先業  
出遊尙與幽人期問年又逮杖鄉日一莖乞取相扶持  
天生此物亦正直桃竹禿盡江心枝杜老長歌豈復有  
寄來但誦昌黎詩

將出遊董勿軒適至

遠山雲氣少今日可閒遊市有栽花叟城多賣酒樓恰

聞名士履好典老翁衰祇恐詩篇出時人賞不休

老境

老境頽唐甚山林恐未深酒逢佳日醉詩避少年吟聽  
鶴烟中語窺僧定後心疎狂疇昔態不用更相尋

對月懷韋映輝石鐵人賦寄

北雁飛難到無從寄一詩每當看月處便憶過河時僻  
逕人蹤少荒村客飯遲諸君歡讌夜可暇說相思

次日再寄鐵人

仕隱行蹤異東南地畛分長愁君憶我不說我思君偶

得舊藏紙欲書新著文石樓望不見翹首送斜曛

夜

腹疾無高枕秋涼夜已分林空殘月見風定遠鐘聞得  
句窺鄰火懷人隔嶽雲昨宵清夢穩身與海鷗羣

種竹

常恐秋雲薄空庭種竹根浸泉滋土脉移石破苔痕  
節終名世清風已到門尙嫌城市近不似水邊村

古松

卓立千松頂山行屢見根問年爭世代有鶴長兒孫白

日留雲氣青柯避斧痕更憐多節目無復鬼狐捫

九月十五夜對月

銀蟾玉兔影悠悠仍舊空庭似水流千里懸知共明月  
一年疑有兩中秋縱教無酒還能賦不爲懷人亦倚樓  
欲向姮娥相問訊天邊重賦羽衣不

月夜

月明生衆影夜靜息羣心此境秋先覺何人意獨深風  
泉兼入戶鴉鵲並棲林惟有遲眠者中宵自苦吟

酬董勿軒乞筆

君不見渤海初得右軍筆硯如頑石墨如漆筆工戒兒  
與尋常誓處囊中穎不出又不見宣城諸葛馳時名坡  
谷毀譽無定評兩公嗜好猶如此世人何足爲重輕勿  
軒詩才掩近代毫端埽盡寒儉態醉後擘窠亦作書衆  
中拔戟自成隊朝來手持詩一篇書家腕脫爭鈔傳已  
是生花入夢寐自然落紙飛雲烟喃喃却誦昌黎傳中  
書老秃竟如見爲君幾度焚欲空何物曾經手自選千  
搜萬索徒貽羞管城骨相難封侯貪狼妄嗣中山族瘦  
羊安能擅風流置君懷袖君莫笑冢筆祭詩有同調他

年若復籠鵲羣烹一杯羹宰相召

詠蘭

深山曾獨往中夜每長歎寂寂秋風裏悠悠野草看固  
知鉏不易究竟佩原難挾策思當日焚膏盡是蘭

秋睡

秋睡多醒候呼孫夜賦詩不吟人亦瘦旣老我何悲得  
句一蟲覺苦心殘月知朝來書在紙白賞更無疑

門前

常恨雲山淺門前馬跡多及歸相識少有客別家過清

酒高樓醉紅裙小院歌閉門元草就白髮已皤皤

試筆

高插珊瑚不著塵麝煤初染露華勻乍疑拒手如生客  
旋覺同心似故人毫在羊羣驚落雪花從夢底記經春  
禿來敢道全無用試埽烟雲更有神

磨墨

鉢聲停處笑相看腹稿粗成筆尚乾擣麝共知千鋌在  
燒松何惜一螺殘銀瓶乍汲雲泉暖玉手初磨翠袖寒  
若使豹囊同霧隱人前口誦舌翻瀾

和董勿軒弄兒詩

才人生子不妨遲  
眼見聰明學語時  
抱向門前看擲果  
呼來膝上聽吟詩  
婦嫌未與鳩車戲  
妾愛能將竹馬騎  
莫怪逢人如說項  
丈夫有癖是譽兒

看劍

怨仇鎖細不堪論  
撫劍雄心故自存  
未飲醇醪先有恨  
曾披舊史恐辜恩  
倚天秋色失星彩  
斫地土花凝血痕  
藏在匣中三尺水  
深潭已奪老蛟魂

檢書



萬卷縱橫掠影如白頭仰屋每歛歛難教此日迷三豕  
空負當年載五車黃葉聲中分杖杜碧山陰底認蠅魚  
夜深尙有紅椽燭不假青藜照檢書

雁字四首

鳥跡年來已失真驚看鴻雁一行勾高秋文字懸霄漢  
絕代聲名有主賓換得鷺羣空自好塗成鴉陣恐生嗔  
天邊摹取書千遍揮霍雲烟不染塵

長留筆陣向青天低視人間翰墨緣海外挾來風雨勢  
雲中比得弟兄肩奇書直到從心後清淚如鳴得意先

次仲無端隳羽翮家雞野鷺各紛然

碧落幾同沒字碑憑空結構始稱奇短長所向如人意  
肥瘦之間是我師九萬里餘無窒礙三千年上少然疑  
如何白玉樓成日不寫飛鴻絕妙詞

終日書空不惜勞書成莫更問天高隱纏奎宿文猶曲  
暫落沙汀篆亦豪摛藻宜爲鵲令頌紀官却讓鳳凰毛  
可憐滿地蟲魚影註疏家家染兔毫

雁陣

冥冥直到九霄前還似孤軍向外懸乘夜聲愁鷺鴨亂

奪人勢作鳥蛇先萬家砧杵響秋月幾處驛樓衝曉烟  
聞道雁奴蕭瑟甚驚心風鶴不曾眠

聽落葉曲

大葉琮琤如石泉小葉蕭瑟如細雨風來葉聲雜風聲  
風定落葉祇自語有時一葉飛窻虛凍蠅觸紙何徐徐  
前葉未墜後葉下終宵斷續紛相於老夫靜聽不肯臥  
欲撫孤桐倡且和白雁不鳴烏鵲棲床頭一穗燈火大  
憶昔拄杖荒山中千重古木悲秋風江波海浪一齊湧  
金戈鐵馬撞虛空虎豹股栗無善步蛟龍潛伏不敢怒

野狐山鬼徒噓噓  
吻口卷舌竄塚墓  
爾時懷抱無住開  
愁中傾酒三百杯  
小樓樓下聽落葉  
此心但願秋風來  
欲落不落更可喜  
不用清流去洗耳  
曉起門外丹黃深  
出入庭堦滑屐齒  
兒童欲埽呼且休  
哀蟬曲罷風颼颼  
菊有霜枝松有節  
請看直幹高倚樓

### 拾落葉

家享千金帚  
丹黃雜屐前  
埽愁雲共去  
拾愛露猶鮮  
細辨到門逕  
斜添空竈烟  
罨絲如蝶影  
枝上任翩翩

### 和勿軒風洞坡

南山竟作御風遊，高處居然小一州。  
白日陰沉藏鬼魅，青峰偃蹇伏蛟虬。  
履聲已落殘雲外，瓢影猶懸古樹頭。  
我亦欲騎鵬背上，扶搖九萬遠相求。

滄海吟酬張柏軒孝廉

昔年曾登泰山上，日觀天門屹相向。  
雞鳴下瞰瀛海東，湧出紅輪逕三丈。  
爾時便欲乘長風，一帆直破萬里浪。  
銅鉏挂處睨扶桑，折取餘枝作雙杖。  
仙人不借蓮葉舟，了髻持書自蕩漾。  
長鯨千里如連山，桂櫂蘭槳未敢抗。  
峩舸巨艦隨春潮，載酒兩頭暫命撈。  
眼中才見大方家，

江清河濁不自量歸來但學掩關坐縹緲層城有物障  
今朝忽得新詩篇如登岱頂更遠嚮大海全移斗室中  
百谷區區少輩行先生低視梁父吟嘆余難爲小海唱  
憶昨畏人居潭西聞道高軒辱過訪咫尺竟成千里遙  
夢底相思倍惆悵東海北海合并多矧是衡宇可接望  
文章有道交有神杜老之言不我誑幾時得侍成連旁  
濯洗俗塵發昭曠耳邊箏笛誰復聽一曲水仙聆嘉尚

和勿軒文陽

柴門倚杖文陽東不到黃昏自不同  
迥野適開三里霧

疎林新染半江楓卽看倒影羣山紫正有餘霞一抹紅  
牛背笛聲歸未歇相將收入畫圖中

曉月

雞聲喔喔五更風曉月光寒透遠空驛路凌霜嘶瘦馬  
沙洲滴露警哀鴻當年聽角愁遷客此際聞鍾笑老翁  
幾點疎星猶共照滄溟已上日輪紅

雁字後四首

天矯游龍不可方憐渠燕燕未成章書逢四海大同日  
飛向中原無抗行作字如愁天闊淡尙文欲與日輝煌

奔波已少鴻都石白雁青雲路正長

塗抹東西有羽毛不分南北任由敖塞垣來處曾憐武  
湘水過時亦寫騷縱浴滄溟疑洗墨歸休大陸似停毫  
漢家班固稱良史竟忘飛龍附爾曹

何嘗染翰負專門妙處如斯未易言驟雨狂風書自聖  
飄鸞泊鳳體尤尊分行盡是烟雲氣飛白全無筆墨痕  
半日舉頭天外望臨池姿媚更誰論

金狄帝闕最高寒記室翩翩壓建安既有文章驚海內  
又無繳射到雲端突凌絕島風霜老斜度孤峰點畫殘



同是生當太平日飛來莫作羽書看

寄菴詩鈔續二 丁卯

寧州劉大紳

張金門移家

乍聽如輕去來看不借車新居猶故里舊宅卽鄰家屋  
後山仍見牆邊徑自斜泥梁春燕子莫怨別天涯

題畫

喬木蒼蒼倚落暉琴彈流水坐忘歸客來便是仙人侶  
畫出休嗟識者稀一日襟期邀月上百年心跡看雲飛  
何嘗此境人間少未得從君寫翠微

寄江曉

窮官天賦與遠道獨憐吾不爲饑寒去曾將患難俱夢  
中時見汝客至悞相呼飄泊今何處多應在五湖

答張栢軒

憶君正及風雨時到門無客長相思借得仙人鐵拄杖  
蛟龍不敢空中騎夢底相尋路可識相見無由認顏色  
美人貽我新詩篇雲錦明珠一夕得開緘喜極還復羞  
石淙相業今無儔七子禺山稱傑出蘇楊門戶同千秋  
國朝文章應運起前有王段後錢李中間才子何繽紛

照耀華山與昆水  
是皆恥學章句儒  
姬公孔子甘爲徒  
人在詩中事詩外  
雕蟲少作真區區  
我望諸人如天上  
風馬雲車絕依傍  
傾心門外聽清商  
縮手袖間觀大匠  
新詩不厭千廻吟  
褒榮一字慚知音  
更假讀書二十載  
三唐兩漢相浸淫

讀孫太初詩

李白騎鯨去世間  
無此詩蕭騷才子恨  
鬱結鬼仙悲  
朗誦高人傳長吟  
幼婦辭青山明月夜  
萬古尙相思

繡毬花

綠雲四垂紫雲斷水晶簾幙壓銀蒜明  
蟾泣雨飛上天  
天雞熟睡夜未半帝倦投壺玉女笑重霄蹴鞠戲相看  
天孫有錦細碎剪巧結同心露皓腕綵鳳偷銜到人間  
碧闌干外綺霞亂仙人親授夢中簡安得思如星雲爛

翡翠

碧梧枝朽琅玕稀孔鸞損瘦雞鶩肥  
五彩烟雲天上落  
一羣翡翠中庭飛城頭烏鴉一例黑  
鴟鴞晝伏彈不得  
衆中忽見形質殊謠啄紛紛豈可測  
天生文鳥如文人  
行疎志廣難容身鸚鵡才華絕一世  
鷦鷯詞賦空千春

閉置雕籠有儕輩鼎俎蒙登更襪襪休爲公子頭上冠  
莫伴美人眉間黛巖巖深處無鷹鷂入山服藥多神仙  
語汝呼羣從此去青松元鶴同歲年

星回節

華人不改夷人風蒼松斫盡青山童推倒落日舉火戲  
強排星宿摩晴空大鄉整次何爰熱小鄉零亂不成列  
孤村落落三兩家曙後殘星明還滅攔街擊鼓爭然鬚  
老翁嗔怒兒童癡持火出門照田下自言勝似前年時  
人生萬事無過求逢人且話松明樓生肉燒酒旣醉飽

城上抱孫看斗牛孫歲初遇太幼穉嬉笑懷中不肯睡  
山頭隱隱明月光盡摘天星始快意

瘐狗

麒麟白澤已無有不畏猛虎畏瘐狗猛虎斑斑不食人  
瘐狗嗷嗷張其口能令大道荆棘生國門晝閉無人行  
神雅高飛社鬼伏弧矢星殞天狗明我有歐冶鐵百鍊  
殺人隱約血一線出匣常教兇象驚及鋒要與蛟龍戰  
嗟爾何足汗吾刀當塗置棒如牛毛一狗伏尸衆狗竄  
磨牙礪齒空自豪

賦得碧雞送勿軒赴舉并寄蔭塘

秋風吹影彩雲西  
昆水華山入望低  
丹鳳樓前久相待  
碧梧枝上好雙棲  
求仙漢室招何暮  
作賦揚家夢不迷  
偏是土人輕薄甚  
夕陽村落自呼雞

金門來卽去

兩月城頭足風雨  
世上無人著脚處  
我旣不往君不來  
今日如何來卽去  
來時曾見董生無  
董生議論眉山蘇  
我亦有文附其後  
出讀且爲留斯須  
天下幾人是知己  
屈指舊游半生死  
文章無道交無神  
惟我與君俱老矣



君今欲去不可留相期明日來登樓一角青山一石酒  
看山飲酒何所求

秋海棠花

泣蛩咽蟬怨秋雨不是昔時紅濕處誰家斜捲珍珠簾  
何人碎擊珊瑚樹芙蓉花外香雲流美人日暮憑高樓  
陌上雕鞍去不返樓頭玉筍傾難收大珠小珠何絡繹  
秋風豈爲紅顏惜不覺淚已滴作花尙嫌身未化爲石  
望夫片石長相思花開花落無人知君不見深閨兒女  
驕且癡鬢雲鬢霧簪花時

夢先祖索觀近日詩集後一作爲鹿生雪樵代筆  
吾祖年五十吾生與同日吾祖笑顧之先世德無失觀  
眸有長句春華秋冀實萬事無一成飄忽生白髮昨宵  
感入夢索觀近詩帙歡喜如平生竟忘閉幽室篇終綴  
珠玉福山雪樵筆祖孫隔死生朋友間山岳叶魚縮地律切  
虛仙方返魂覺幻術冰淵凜遲暮幽明庶可質終惜百  
年期少壯去若駛朝來抱孫子長懷夙繞膝

桂樹

秋花如粟露如珠老眼看花與世殊久已無詩招隱士

更將何物待狂夫  
臨風每笑中原少  
對月還嫌上界孤  
行劓荒園荆棘盡  
圍廬手種一千株

潭西草堂攜孫往得詩四首

城門逢皂隸長鞭策羣馬  
隘巷趨避之老夫久聾啞  
年衰無所營閒散嗜田野  
家貧鮮僮僕弱孫從上下  
溪深不可涉行紆道許假涼  
風過橋頭偶坐亦瀟灑

田中稻禾長遂迷昨日路  
欲問村中農四顧一無遇  
遺簣短塍下不知人何去  
忽聞笑語聲來自禾深處  
今年定大有粥殮及婦孺

涼笠到草堂門前花艷艷呼孫啟柴扉紅霞更騰閃多情是造物小草亦渲染回首浣江邊波光何潏灩刺桐花一樹十丈吐光燭巨細物不齊采色快所覽風人久不作空自懷鉛槧

夕日在草堂山色入懷抱圓瓜手自摘離離尙苦小土釜潭水清火足味乃好未饑已先食何緣歎不飽況有二頃田膏腴種嘉稻老農芸旣歸笠上花可掃人生貴知足稼穡誠堪寶

桂樹下作示孫子

萬物苦榮落常恐涼飈至岑寂深山中蕭森及此始草木得秋氣香清色不媚各有本性存生產亦擇地北人種桂樹成林未可冀十丈凌虛空南中別爲志家貧無玩好一歲華三四欲持獻君王路遠莫能致

垂老讀詩書掩卷若未讀旣曾經我眼其味已在腹仰視天宇高雲日相追逐中庭有桂樹香氣何馥郁正值秋風清無人溷茅屋樹根有磐石可以適我獨悠然一夢間晚炊尙未熟

刈蘭旣忘憂樹桂復娛老時時有臭味無風亦自好偶

然得佳句音均輒顛倒信手題壁間點畫更潦草我有  
兩孫子小者在懷抱大者如我長不屑讀詩稿崑玉與  
桂枝古人同所寶行誼終身事豈必廢詞藻

### 山房

春花開後種秋花日靜重門竹影斜睡起時攜孫放鶴  
吟成輒喚婦煎茶垂檐白水喧朝雨繞屋青烟和晚霞  
多病尙嫌城市近雲山深處欲移家

### 草堂

潭西便是好家居分得清泉到草廬崑谷隨時錫名字

妻孥終歲在樵漁客來即與沽村酒醉後時還說古  
柱杖柴門相送處一江落日晚烟餘

哭昭華弟

吾宗衰已甚於汝又東鄰生死有今日弟兄餘幾人花  
開棠棣淚鳥愴鵲鵲神拭面思前月相過笑語真

八月十二日夜月下

一年一度中秋節未到中秋便有情俠客飛騰看劍影  
游仙汗漫聽琴聲空山讀史兼憂樂暮歲懷人半死生  
已是遲眠還不寐起浮大白待雞鳴

月夜

蟾蜍不死顧兔壽纖阿御之天上走仙人玉斧世莫窺  
鵲立瞻望徹曉漏清流皓白神泉溫玉體淨浴齒細漱  
誰如濯魄冰壺中萬物汶汶拒弗受清夜苦吟不安寢  
一首詩成骨已瘦人瘦月缺同可悲嫦娥涕濕霓裳袖  
斷髭

正是金風玉露時一宵對月苦吟詩不知瘦減腰多少  
只惜幾莖拈斷髭

十四夜不見月得絕句寄竹溪太史



已離海水上蓬山知到明河第幾灣夜靜不須頻翹首  
從來天上隔人間

閱家瑞遺書泣然

千里名駒語不虛交游悞爾痛何如豈惟朽骨埋荒草  
尙有遺編長蠹魚涼雨經時蘭葉瘦秋風過處竹竿疎  
空留爾父譽兒恨落日橋頭憶舊居

李向宸惠大菰豆

猶記棚陰唱竹枝涼秋長莢已離離攜來澹雨微雪後  
煮向殘杯冷炙時老圃問名多未識腐儒得味輒相思

如何種豆南山下行樂空餘一頃箕

重陽前二日同張心傳過東華寺楊燦功留飲

昔人愛重九時至不虛度登高及佳日往往有新賦我  
今先期來村墟得勝處佩囊滿茱萸豈爲神仙悞秋風  
在落木寒花出老圃夢中雙蛺蝶忽向枝間遇壺尊旣  
已傾盤殮復兼具不莊亦不屈相與傾其趣祇恐風雨  
來泥塗汙吾素詠歸夕陽前何待悲遲暮幸無敗意人  
九日再趨步

風雨

衰年懷令節風雨如登臨不辨鬼神意誰知泉石心  
山城沽酒賤秋草閉門深空有昨宵夢遠望楓樹林

趙東曙種菊相遺枝葉無過人處而秋意不乏暇  
日爲詩一章謝之

松下移根記自春籬邊今已及霜辰雁將秋色出三逕  
蜂伴晚香來四鄰但使疎枝無俗態卽如空谷有幽人  
儷花鬪葉園丁事誰著淵明漉酒巾

立冬日趙東曙重遺紫菊花

昨宵興盡秋風裏何意東籬復有花衰柳聲中飛絳雪

夕陽影外落紅霞舊憐晚節不相負近少清吟空自嗟  
直爲朝饑輕采服白衣人尙隔天涯

答在宥

祖宗遺訓只清貧告廟金多愧此身徵辟復官由

聖主贖歸破產仗愚民可聞衣錦還鄉日尙作吹簫乞  
食人天使不同廉吏沒義田終與范公鄰

不恨

不恨雲山淺三年一草廬倦遊詩興在多病酒杯疎鄉  
里添知已長安欠報書今冬冰雪晚黃葉似秋初

夢石鐵人

昨夜夢石子勸我作畫師手攜古卷軸八十數有奇學  
書記姓名未摹秦漢碑殘年精力盡繪事安可期石子  
顧我笑霜風生茅茨忽然憶董子采生死多然疑君家  
師友誼風流黃河湄翻雲覆雨輩齒牙羞及之昔年得  
聚處往往成小詩脫稿忘妍醜手鈔不言疲邇來偶有  
作相思無已時相思不入夢入夢未相思乘除造化理  
萬事類若斯醒後書在紙何日君得知

梅花四首

山中寂寞待春時散盡愁懷此一枝隔院風清人不覺  
出檐花發鳥先窺縱無冰雪有寒意不少題名多俗詩  
何似滿園桃李樹間隨流水寄相思

一代清名不可攀卽栽城市亦深山著花盡在烟雲外  
顧影誰爲伯仲間天地多材宜有此風塵無事獨相關  
南中舊說冰霜少冬日檐前自駐顏

黃巢嶺邊情最多玉梅花下又清歌不堪昨日故人去  
奈此前村風雪何伴爾山林才有色非余衰老復誰過  
未曾清俸買雙鶴悵望白雲空似羅

枯桐獨繭未能彈  
月色泉聲得古歡  
一任金尊廻玉腕  
莫將飛蓋擁崇冠  
人如鐵石始能賦  
詩到宋元終是難  
讀罷暗香疏影句  
滿堂襟袖不勝寒

梅花又四首

春風吹出賣花聲  
笑汝紛紛浪得名  
殘雪寒山曾獨往  
短橋流水有餘情  
人家半近蒼烟住  
門巷斜聯亂石橫  
詩思縱然清入骨  
梅花終是比詩清

只有梅花無四鄰  
以花爲主我爲賓  
飲千日酒愁先醉  
和隔年詩恐易陳  
放鶴厭聞歸日語  
尋僧難出定中身

安能樂事崇朝並林下相逢絕代人

絹頭涼雨每相看身與妻孥鎮日歡十里烟銷孤樹暗  
半江月上一枝寒清如無韻尙嫌俗瘦到不癡才是難  
莫弄龍吟羗竹管滿山風雨落花殘

位置風烟不礙門直攜明月到前軒枯枝朽蛻龍蛇骨  
冷豔寒分雨雪痕判得清名塞天地留將老幹與兒孫  
幾回欲向瀛洲問人道仙家無此園

紅梅

羽客惟知餐玉雪美人空自染臙脂山中高士心無事



吟罷酡顏倚酒時

寄菴詩鈔續三 戊辰

寧州劉大紳

水仙花

烟波渺渺少人家  
彈罷瑤琴月已斜  
絕俗仙妃何處望  
隔江相對有梅花

食鷓鴣偶成一絕

老驥曾行萬里途  
晚烟落日每相呼  
今年飽食山中味  
却愧詩名鄭鷓鴣

水仙花吟

江水無聲江月斜輕舟一葉青蓮花仙人出遊自貴重  
珠樓翠戶空天涯江上人家隔修竹山色青青水色綠  
半生遺悞求神仙種得好花皎如玉重門小閣無人知  
拳石作山盆作池影在若有若無處香是欲來不來時  
牀頭斗酒不解渴笑借鄰家金鑿落醉鄉睡鄉紛相聯  
夢與仙人乞大藥陳王徒自賦洛神不爲此花一寫真  
我輩得才共二斗慚愧水仙魚媵臣終當泛宅東海上  
朝潮晚汐互震蕩成連有時移我情不須延頸四顧望

短歌爲柯蔭塘作

長安市上車馬稀岳陽城下烟波微名士多情解龜去  
仙人盡興騎鶴歸不識有無桃花樹曾否紅霞迷去路  
祇今醉死亦不辭仙源近許酒家住酒家本是吾州賢  
西林坐破青寒氈四十功名不稱意傾家學釀山水邊  
東南屹礪隔日至瓦瓶土壘貴快意皮袋羞澁銅錢空  
十飲九賒煩筆記天生此輩真吾徒男畊女樵無詐虞  
咫尺城中足官府空勞野鳥歌提壺提壺聲入耳  
同醉獨醒俱已矣青帘一片春風吹門外悠悠半江水

出城訪趙敬修

連朝風色妬春晴  
四面青山雪已橫  
來看高人僵臥未  
隔籬剛聽閉門聲

出遊

彊隨風月作遊人  
蕭颯髭鬚不稱春  
山寺題名多故鬼  
江村雜屐盡飛塵  
初生才說前丁卯  
垂老旋經後戊辰  
但醉休矜文字飲  
黃金虛牝費精神

杏花

不見參差燕影斜  
隔牆文杏屬誰家  
山城野店新沽酒  
曉雨春風又看花  
曲澗清流原未凍  
小園芳草漸能遮

世無紫鳳吹簫客獨自騎驢對晚霞

重遊天樓洞同趙敬修張金門柯蔭塘

由竇尙書學不成公然洞口作蛇行得門自喜腰圍減  
入穴齊呼眼界生雲擁蜃樓天上坐春回雷鼓地中鳴  
從今好共仙人飲攜得前村酒味清

停杯掉臂洞中行一曲狂歌別有情分少南山多古意  
願如東野以詩鳴外人漫說乘虛入坐客相夸履險平  
本是山林舊知己倒垂仙鼠不須驚

久別雲山路恐生誰知登覽此身輕如空中戲不思議

從壁上觀皆膝行醉愛虎來時鼓瑟醒騎鶴去一吹笙  
桃花流水何曾異更喜無人問姓名

七十張公意氣橫趙公八十善游行我年六十亦垂老  
若視二公猶後生策杖探奇同入畫衙杯屬賦未能鳴  
不如痛飲讀騷士釀酒潭頭家可傾

煮豆歌

煮酒作狂客煮豆爲閒人狂名六十載畏人嫌我真築  
室青山中買田潭水濱四體素不勤力作賴比鄰和風  
隴上過麥浪蹙魚鱗戎菽長其間溫於養蠶辰童僕汲

井水婦子拾柳薪移石指瓦釜三足高且勻須臾得一  
飽短塍坐無塵弱孫甫歲半嗜之如八珍人生適意處  
鄉村風味淳俯仰卽上古我亦葛天民

再爲煮豆歌同張金門試振第

昨宵曾有入山約君不得閒苦寂寞今朝我又思出遊  
巷遇歡然償夙諾流行坎止何有常人生及時好行樂  
今日豆實猶青清明日離離豆萁落兩家孫子頭角成  
白首互抱腰力弱黃口何知山水佳眼見流泉亦雀躍  
令弟多年不入山且從癡奴跨邱壑草堂無客門戶屨



笑向鄰家問鎖鑰登堂自拂几上塵不假尊罍爲軟脚  
移薪乞火須與問田家滋味勝餽飪終歲辛勤賴農夫  
此時叱牛正力作熙熙婦子曾飽不我輩加餐不畊獲  
食罷再爲煮豆歌炊烟一縷出高閣

後煮豆歌

潭頭豆已老煮食猶欣然既飽無餘慕散步巖壑前拂  
衣風習習濯足泉涓涓道逢植杖叟相與談神仙往古  
如今日斯人無愚賢此生苟易足行止皆安便笑指畊  
牛倦脫輓高柳邊適口擇青藟鳥鵲爭集肩嬉嬉搖其

尾不畏人加鞭亦有拙鳩婦飛鳴桑樹巔呼逐自偶爾  
風雨下晴川絮語歸來晚明朝寒食天

重過花溪憶昭華

丹崖百尺俯清溪舊逕重來尙不迷可惜阿昭歸去早  
杜鵑枝上杜鵑啼

杜鵑花

鶴林渺何處沉吟對春風仙人殷七七招我來山中花  
開不知數但見山爲紅暮霞與野燒未覺誰雌雄笑彼  
名園裏終歲種花翁相看僅十日枯榮有異同豈知天

地力迥然殊人工方欲緣南北忽復迷西東如何子規  
鳥聲聲怨芳叢人心感哀樂萬彙如相通旣愁花枝盡  
復訝酒杯空勝遊繼明日更假晴雲烘

麗春花

朱闌紅藥送殘霞庭樹春深綠漸加曉見仙人騎彩鳳  
背毛散作小園花

米囊花

晚節希風五柳莊盈餅有粟未全荒朝來飽食桃花粥  
又向園中摘米囊

夢王秋水秋水嘗言別寄菴後當遊南粵思其人  
則夢夢不可以無言也

兩年不見王秋水定咬荔茭在嶺南親見番禺詩境未  
昨宵入夢髮麤麤七月中歷下書來秋水果遊嶺南矣

青梅

齒牙落盡舌空存自摘青梅向晚園長憶兒時真有味  
津津不露皺眉痕

草堂

聽闌啼鳥折花枝此處常如春夏時自愛鄰翁同邑屋

豈因雞犬隔籬籬汲多井水曾先竭見慣巖巒不覺奇  
寫入屏風成故事有人遠道寄新詩

舌痛

儒墨紛綸各自尊唇焦齒敝可忘言吟哦尚惱幽人夢  
直到今宵舌欲捫

將賣草堂

草堂賣後有圖存不獨高樓可抱孫千古浣花終屬杜  
一時州宅自夸元清吟猶繫屋邊柳舊交頻懷江上村  
與作鄰家來往易時隨風月到柴門

閨荷鋤圖

寂寞浣江濱圖成二十春久藏知不做乍見訝何人肥  
瘦如千古榮枯此一身終師羨門子蟬蛻出風塵

蚊

碧紗帳擁簟紋清雨後風涼暑亦平一夜安眠無噩夢  
聚蚊空自作雷聲

斫竹

中庭栽惡竹風雨日平安常恐青山掩空將白眼看  
中吾自有逕底爾無端尙憶杜陵老斫時須萬竿

龍珠巖瀑布

一龍昂昂西南來一龍傲視掀風雷  
走電怒未息明珠閃爍爭相摧  
千金重寶爲誰有石飛壁立高崔嵬  
兩崖清泉瀉百斛潭潭窟宅堪疑猜  
惜其居下澤不遠月光日影徒徘徊  
一朝快意值風雨岸崩峽坼聲喧逐  
驚濤奔浪舞蛟蜃銀河自倒非人推  
水晶臺榭鑿空見珠簾拂地無由開  
狂歌呼龍龍欲出夜光炯炯離塵埃  
平生足跡半天下如此壯觀難與臺  
少年遊興今尙在攀援爲爾能千回

詣草堂

扶病出城頭已在青山裏僻逕不逢人自攜小孫子溪  
流清且淺足下石齒齒攝衣徑過之不曾濕素履涼風  
從何來稻花香不已樂事是田園亦復是山水入門問  
阿母阿母睡將起

草堂坐移時出步長松下清風無時休萬古自瀟灑在  
目龍蛇飛入耳波濤瀉山中多不材誰是棟梁者鳩鵲  
何紛紛結巢亦聊且欲買青田姿高標謝妖冶世世長  
子孫清淚滿四野



纂書

水乘舟楫陸乘車載得樓頭幾卷書政暇丹鉛曾自校  
年衰燈火已相疎幸無婦女藏針黹喜有兒童拾蠹魚  
犢鼻長竿懸百尺秋風獵獵定何如

山行

一山風雨一山晴獨在涼雲深處行白羽綠簑都不用  
歸來始羨此身輕

詩草

詩草無端塞敝廬一生事業自迂疎每逢敵手懽相得

但見前賢愧不如  
嶺上松聲來枕後  
宅邊柳色入杯初  
懶教子弟懷鉛槧  
老眼昏騰手自書

芭蕉

狂草龍蛇跡弗如  
小樓一枕睡醒初  
篋中賸有高麗繭  
不向芭蕉葉上書

七月九日得厯下書并新刻詩冊

厯下書來是隔年  
情同遠道共綿綿  
三番寒暑我無恙  
萬里死生人亂傳  
回首秋風才度雁  
何心老樹又聽蟬  
陳言寄到刪難盡  
空費明湖買酒錢

見蝶

聽盡芭蕉暮雨涼一杯浮蟻漬衣裳  
童顏不訝難留住蝶到秋來色也黃

牽牛花

曉雨初晴烟未消飛花冉冉意無聊  
有情正似銀河渡長恐雞鳴撤鵲橋

憶潭西刈稻

短鎌颯颯快風吹刈罷隴頭上擔遲  
記聽農歌三月裏微雲澹雨入村時

鄉民不解詠幽風穫稻常趨七月功尙恐來朝阻秋雨  
傾盆聲響夕陽中

觀刈稻

鄉村重農事禾稼時關心登城試一望四野黃雲深我  
亦畊數畝旦夕悲秋霖齊集比鄰力無使鳥鼠侵短鎌  
不停手耨板聲相尋雲中漏白日照耀千黃金田父笑  
謂予上年強如今昇平無歎歲歡娛有好音但願儲擔  
石便足了山林所慚袖手食不異蛙書蟬倚杖田間坐  
聽我梁父吟

瘦甚自嘲

人生初墮地便以百年期殤子與彭祖茫茫難預知肥  
瘦各有體壽夭不在斯大專槃萬物取舍殊萬歧我年  
六十一稜稜骨隱皮閉戶怯明鏡出門羞小兒小兒多  
謔浪親故或嗟咨盡道長途下相逢恐不知少年學冲  
舉求仙真大癡暮歲一生死恥爲形骸私生釀萬石酒  
死留千首詩骨朽人不朽耳喜非吾師况復百二十舍  
我其將誰侏儒與方朔但可論飽饑請看騏驎足并觀  
鸞鶴姿柴立君勿笑秉燭游軒義

抱雞行

犁人爲牛輿人馬嫠婦蟲沙杵臼下朝春夕簸身手僵  
分得糠覈不盈把作糜粥粥呼雌雞雞肥不食孤兒啼  
附耳再三爲兒語賣雞與汝買棗梨嫠婦抱雞入城市  
不知城中有官吏東村賣犬柳未開北里買豚索長繫  
雞豚狗彘何紛紛天鷲野鷲空成羣嫠婦淒然抱雞去  
市人嘖嘖稱神君

新月

清秋新月色來在故人先一見添高興從茲減早眠修

篁斜有影片玉澹生烟莫爲蟾光少張燈照綺筵

秋

空堦積雨長莓苔野卉山花盡不開多謝鄰家紅桂樹  
一枝送過短牆來

山村

人事有榮落遊興無是非出門每獨往長歌殊采薇一  
徑出田間孤村山四圍澄潭不受釣荇藻空中依娑羅  
葉爲帽棕櫚皮作衣遲行禦風雨久坐送斜暉黃雀來  
西北翺翺隴畔飛登場有餘粒呼啄及細微況我得安

飽豈憂來歲饑俯仰千古下愴然忘賦歸

聞蟋蟀

如爾亦微物不應多不平未知何日歇早覺是秋聲客  
子難爲夜家居尙有情燈前無落葉故故欲相驚

復聞蟋蟀

清宵才及半又向枕邊聞聽慣如相識歌成竟不分孤  
吟醒俗耳冷氣逼秋雲雞犬牆陰下何聲是出羣

十六夜見月中秋浮雲竟夕回憶上年同此情景  
抱病獨臥不勝愴然



兩年虛度中秋節同望今宵倍可憐離海十分塵積霧  
臨人一夜歛晴烟天如有例惟仍舊月自多情却正圓  
縱是衰翁因病臥精神常戀彩雲邊

曉起對月

竟侶茅店月獨倚早行時未覺清光減深愁逸興遲遠  
寺鐘聲動高樓樹色移今宵沽美酒對飲一千卮  
落日白菊花籬邊逸興多抱花黃蝶見傾酒白雲過秋  
色宜如此衰顏半已酡何人揮玉塵月下共婆娑

墨菊花

誰向酒樓題粉壁淋漓墨汁上秋花三閭以後無知此  
兩晉之時有作家巖穴高寒初解綬烟林搖落未棲鴉  
樽前我欲分餘潤橫掃禿毫寫暮霞

西洋菊

荒徑風寒日易斜清秋佳色說陶家樓船踏破金鰲背  
盡向西洋學種花

吟詩

後人吾不見古昔又何悲有作同無用長吟欲替誰夜  
殘聽故鬼歲暮祭新詩多少遊仙夢驚醒得句時

往來千載上俯仰數椽中蟋蟀爭秋夜芙蓉散早風情  
深時有恨吟久已成翁故舊詩筒在天邊望遠鴻

菊花吟

春花麗人賦秋花高士詩春花秋花不合并麗人高士  
同相思今年况又苦秋雨堦前積水成方池傾甕祇餘  
桑落酒闌逕絕少菊花枝清晨忽將數本至吾弟如與  
仙人期一雙黃鵠雲中下白玉羌笛臨風吹吹到入破  
聲何悲秋花不似春花時使我對此忘朝饑不因無米  
歎晨炊寒蟬衰雁非新知山中處士今安之蒼烟白日

來疎籬

又歌

有月卽中秋有菊卽重九俗士拘牽多往往風雨負南山秋氣佳市塵拒弗受滿園散黃金祇在七月後我來已過時尙得簪白首終愧山中人先私作已有一酌酬清風再酌酬良友園翁從事賢悔不酌大斗涓涓涼露晨采服盡黃耆青蕊無奈何太息杜陵叟底事庾子山無叢亦姑取

九日從新田叔父登高

龍山何似此山高九日追隨敢憚勞座客能文休落帽  
吾家有例不題糕好憑絳葉傳新詠一任黃花泛濁醪  
祇恐催租人又至秋風空自負詩豪

絕句二首

七寶香車輾玉塵花開桃李記青春可憐百鍊揚州鏡  
不照妖姬照老人

風吹白雪易盈頭自作歌詞可解憂盡笑香山老居士  
却教小玉按伊州

紀夢

石雞已逐金雞鳴草堂有夢無人驚飄飄忽若出門返  
又聽道上車輪聲春風堤邊折楊柳秋雨黃葉飛山城  
眼前不知南北路意中忘却東西行斗然夢中知是夢  
薜蘿久已移簪纓關山何心不憚遠祖歌一曲離酒傾  
開帆曉月泊落日長鞭古驛涼衫輕半生馳驅亦已甚  
一時寤寐難爲情至人無思亦無夢愚人擾擾奚所營  
百年婚宦豈有極堪歎浮利兼浮名邯鄲美睡只片晌  
仙人枕上呼盧生黃梁炊熟共一飽北邙纍纍多公卿

夜雨

卧聽空堦雨山中一夜長不堪多老境直似在他鄉燈  
火懸秋月衾裯抱曉霜疎鐘來何處更欲共淒涼  
老人秋易覺夜雨夢難成欲向兒童語徒聞偃仰聲寒  
添疎葉響幽動亂泉鳴遠客聽孤雁中宵共此情

昨夜

昨夜無安寢因聽積雨聲今宵仍夢短何處有雞鳴天  
付秋冬氣人懷少壯情悲歌蓬戶底又恐四鄰驚